

欽定剿平三省邪匪方略

欽定剿平三省邪匪方略續編卷十六

癸亥年

七月初一日

癸巳

德楞泰奏言據叅將馬文斌遊

擊涂陞報稱官兵在房縣之鮑家山至蔣家坪

一帶探搜均無賊蹤惟外委常榮在桂連坪老

林殺賊二名生擒一名又據蒲尙佐稟報官兵

在巫山廟垭子等處獲賊二名又據都司麻光

裕稟報在黑洞溝等處搜殺賊匪二名滾巖跌

死四名並據大寧縣知縣郭南英等稟報派出  
差役等協同各處寨勇拏獲賊匪三名殺賊二  
名陣亡鄉勇李文輝冉相國二名其由陰峪河  
折竄烏雲頂賊匪四五十人現據總兵慶溥稟  
報遊擊馬濟勝與楊遇春派出之都司余步雲  
等合兵趕剿追至謝家壩當陽坡該逆遁入巫  
山之大草塘屯紮官兵分爲三路入林搜捕追

趕四十餘里殺賊數名生擒僞先鋒劉世榮等  
九名餘賊四十一名向烏雲頂相思嶺南逃馬  
濟勝余步雲等仍跟蹤尾追臣又飛飭麻光裕  
等併力趕剿並飭叅將馬文斌等由興山之長  
房河向西迎截此股賊匪現據吳熊光知會副  
將孫應奉稟稱該匪竄至鹽場與該處零星匪合  
夥共約八九十人由陰峪河竄至房屬硝硎子

此時既有麻光裕跟追楊遇春亦前往截剿自  
可得手又准豐紳來信所派遊擊王國輔西追  
之賊只有三十餘名並未合夥由關口山老林  
翻山向桃園寶山一帶奔竄現已采入川境此  
外如二竹一帶已無賊匪興房巴東山中雖有  
未淨零匪不過十數人及三五人者兩三起時  
出時沒軍民俱有擒斬其勢斷不能聚集爲患

實不值以大隊官兵久爲牽綴臣於十六日抵

界上之三溪子飭催慶溥吉林泰李天林等安

設卡隘分兵搜捕適提督慶成亦由宜昌趕到

臣卽交令督催並移咨吳熊光查照此時川省

零匪所剩亦不過一二百名臣拜摺後遵

旨西行回川一面沿途排搜有無藏匿零匪就近與

額勒登保會合妥商辦理斷不敢稍有草率致

貽後患奏入

上命軍機大臣傳諭額勒登保德楞泰曰楚省零匪  
本已有限此次復經各處兵勇紛紛殲獲計所剩  
通共不過數十名勢已就盡且衰敗之餘不能聚  
集自不值以大隊官兵爲其牽綴德楞泰於分設  
卡隘後交與慶成督飭搜捕一面卽督兵西行回  
川沿途排搜有無藏匿之匪就近與額勒登保等

會合所見甚是川省零匪據稱亦不過一二百人  
德楞泰與經畧會合時又必續有擒斬務將各處  
遺孽搜緝淨盡俾無一名漏網

上又命軍機大臣傳諭慶成曰此時楚境零匪看來  
漸已肅清但該處山叢箐密最易藏奸歸巴興房  
二竹一帶地方保無未盡餘匪慶成不可因剿捕  
事竣稍爲鬆勁致鎮將相率懈弛惟當飭令按照



段落周歷窮搜留心訪緝至此時搜擒餘匪祇當  
作案犯辦理若仍如軍行時將俘擒之犯概予  
誅不特弁兵等有意邀功或致戕及良善並恐兵  
丁寨民等有仇殺情事殃累無辜慶成當傳知各  
鎮將通飭營員寨員等嗣後帶兵搜捕如遇零星  
餘匪尙敢臨時抗拒打仗成擒者自當仍行斬馘  
其餘拏獲匪黨不得遽行殲戮著各解交該提督

處親提審辦如果實係從逆日久者亦當恭請王  
命正法一面具奏其或係曾充賊目得受偽封情  
罪較重之犯併當解交總督處訊明辦理毋許弁  
兵擅自殺害以重生命至嗣後尋常事宜以及具  
報擒獲一二零匪當咨會吳熊光附報具奏若該  
鎮將等於搜捕時遇有零股殘孽經官兵接仗掃  
除者慶成專摺由驛馳奏

初七日己亥額勒登保奏言臣昨取道七里坪一

帶向大寧山內進發並分派將弁各帶兵勇均  
以一二百人爲一路分道排搜連日經守備顧  
應全在天星橋搜獲賊匪三名叅將哈豐阿等  
在三峽頂老林搜獲賊匪四名均解營審明正  
法又副將馬元在東新交界之峽口場搜捕賊  
斃賊匪七名生擒七名復派都司崔心能赴牛

廠坡搜捕在樹林內生擒十名就近解交大竹  
縣訊明辦理又據叅將羅思舉稟報由雞鳴寺  
向馬家營一帶追剿零匪探悉總兵田朝貴所  
追賊匪卽在黃楊坪屯紮相距不遠卽連夜帶  
兵往捕殺斃五名生擒十四名查訊內有被裹  
民人九名當經省釋其餘訊明正法其竄逸之  
賊奔向秤桿溪老林又經賽冲阿派出在太平

王家壩探剿之副將閻俊烈派兵搜捕殄斃八  
名適田朝貴官兵趕到隨督叅將薛陞等帶領  
兵勇分路追剿連日在桑溪河銀廠坪趕及匪  
蹤生擒十六名並據另路跟剿之都司鄭啟貴  
搜獲先鋒鄧子仲一名都司趙琴獲賊二名共  
活賊十九名均解送來營該匪驚潰分竄田朝  
貴現在分兵搜捕羅忌舉仍回馬家營探搜原

追之賊在風坪趕及賊匪殄斃一名生擒五名  
餘匪又由雞鳴寺老林東竄該叅將現在跟追  
又達斯呼爾岱羅聲臬報連日在雲奉地界  
追捕探悉賊匪屯紮燈盞窩老林隨分兵搜剿  
當經斃賊四名生擒十七名查有甫經被裹者  
二名卽行省釋其餘均係矛手全行正法達斯  
呼爾岱等現督兵向四方石一帶探剿又據守

備張必祿稟報在苦草壩等處殺賊四名生擒  
二名尙有十餘人零星逃散現在跟蹤搜緝又  
接據豐紳報稱前在大埡剿剩賊匪四十餘人  
經遊擊王國輔帶兵跟追至大溪趕及殄斃三  
名生擒二名餘匪二三十人分路逃散現在分  
兵窮搜又據大寧縣稟報該縣寨民等搜獲賊  
匪三名雲陽縣稟報派令投出免死之王國賢

在馬草壩林內招出零匪向洪遠等七名

臣當

卽將拏獲之犯正法其投出之犯籍隸本縣者

交寨保領回管束籍隸他邑者卽遞送回籍安

插毋許留於一處並將王國賢及獲賊寨民均

酌給賞銀以示獎勵又據總兵達自祥稟報派

兵搜獲零匪四名川北一帶現俱寧謐

臣查大

寧開太一帶山內現惟達斯呼爾岱追剿之匪



尙有三四十人田朝貴羅思舉所剿之賊各有  
數十人此外零匪均不過數名至十餘名在大  
山老林避兵潛伏川東各處寨硯委員分段督  
緝亦極嚴密

臣

並將現帶兵勇分爲數路派令

將弁帶領入山逐處探搜期於旬日之內將該  
匪悉數殄除卽或剩有殘匪亦必不能再行糾  
聚至楊遇春所剿由相思嶺烏雲頂奔竄之賊

疊次剿殺只餘三四十人現仍派都司余步雲  
帶兵跟追並知會慶博李天林與德楞泰派出  
之將領各帶官兵搜捕卽日可以掃除據楊遇  
春報稱二竹境內並無賊匪現歸集兵丁由陝  
界向黃墩探剿而來德楞泰已抵川境巫山之  
三溪子辦理設兵防堵各事宜交與慶成督辦  
卽移師回川

臣

現由高坪向東北而進一俟旬

日內德楞泰帶兵由東向西楊遇春帶兵自北而南各路大兵會合則山內有無藏匿零匪更可得其確切情形勒保亦可自西向東而來彼此會晤察看情形卽當會同馳奏六百里之摺仰慰

聖厪

同日祖之望奏言前據楊芳咨報令副將吳廷

剛進山內搜捕零匪曾在月亮坪殺賊五名生擒一名光頭山殺賊二名生擒一名茲又據楊芳咨報近日在天化山林內復殲獲賊匪五名并查有自縊者二名割取耳記呈驗惟據楊芳另札內稱山內原辦零匪但有蹤跡之處俱經逐處搜捕均已淨盡無遺外緣太白山地廣林深從前官兵排搜未到之處另有潛匿賊匪乘

間攢聚竄至洋縣藥壩沿途糾引遊手匪徒約  
共有八九十人當卽派令守備秦繼昌把總袁  
華俊挑帶兵丁馳往截擊因冒雨入林誤中埋伏  
秦繼昌袁華俊奮力衝擊斃賊十數人旋以  
傷重陣亡並傷亡兵勇十數人該鎮聞信卽帶  
兵於鰲山一帶馳進乘夜潛至賊匪屯聚之處  
殺賊九名生擒五名餘匪遁入包家山林箐刻

卽緊躡追殺等語

臣

業已節次札催楊芳等趁

零匪未經散竄之時趕緊聚而殲洗並飛飭地

方官鼓勵寨勇協力堵拏以期迅速辦竣又

臣

續據楊芳札稱副將吳廷剛一路現帶官兵三

百名鄉勇四百名係奉經畧額勒登保派赴南

山協剿所帶鄉勇皆籍隸四川近聞該省寧謐

時動思歸之念擬令吳廷剛帶回經畧軍營遣

散其吳廷剛原帶之兵卽歸該鎮管帶等因

臣

查此起鄉勇自應早爲資遣同籍但吳廷剛熟悉南山情形此時尙有零匪正資協剿未便遽少一得力大員自應將吳廷剛仍留南山協剿至此起鄉勇並卽可由洋縣出山就近送交朱勲資遣同籍

已

分別咨行該鎮道等查照妥

辦所有各路糧餉隨時督飭源源運供均爲左

裕均奏入

上命軍機大臣傳諭額勒登保曰此次額勒登保由  
七里坪一帶向大寧山內進發派令將弁各帶兵  
勇分道入林排搜各路均有斬獲共計一百數十  
名並招出零匪多名現在大寧開太等處達斯呼  
爾岱追剿之匪尙有三四十人田朝貴羅思舉所  
剿之匪各有數十人此外零匪或數名或十餘名



在彼潛匿統計亦不過一百餘人惟應督飭鎮將  
尅日悉數殄除據摺內稱俟旬日內與德楞泰勒  
保等彼此會晤察看情形當會同馳奏六百里喜  
摺當此全局將蕞之際額勒登保自不得不持以  
慎重計此次發摺後已越旬日該經畧等會奏六  
百里之摺諒已馳遞在途不日可到但馳遞喜摺  
後亦難保絕無一二零星殘孽在深山老林潛藏

乘間逸出不可信地方文武官稟報不加嚴察卽如本日祖之望奏到陝省太白山內另有逼出零賊八九十人此皆官兵排搜未到所致朕早經料及總兵楊芳係專剿山內餘匪本有應得之咎念伊尙知據實咨報不敢諱飾是以僅將前次存記加賞陞銜之處暫行註銷稍示薄懲總之剿辦教匪業已延至八年務須力求完善實在剿除淨盡

方不至遺尊復萌倘稍有草率或致別生事端則  
欲速轉遲成何事體如此次發遞六百里奏摺之  
後設有一二餘匪尙須分派將領捕拏亦不因此  
遽加譴責不妨一面據實聲明一面上緊辦淨若  
該經畧等以馳報蕘績在前心存迴護或竟於摺  
內稍有粉飾等情一經發覺額勒登保等轉不能  
辭咎矣至太白山內既有竄出零匪雖經楊芳等

緊躡搜剿究恐不足深恃楊遇春在陝帶兵多年  
素稱奮勇且係該省提督著額勒登保卽飭令楊  
遇春迅速前往督同楊芳吳廷剛等將南山內排  
搜數次勿憚勤苦先將現在逼出數十匪匪趕緊  
辦竣以期早就廓清勿稍延緩爲要

上又命軍機大臣傳諭祖之望曰祖之望奏南山內  
原剩零匪經將弁逐處搜捕業已淨盡無遺惟據

楊芳札稱太白山內從前官兵排搜未到之處另有潛匿賊匪攢聚八九十人竄至洋縣藥壩地方守備秦繼昌把總袁華俊帶兵馳擊殺賊十數人因冒雨入林誤中埋伏受傷陣亡楊芳聞信乘夜進擊殺賊九名生擒五名餘匪遁入包家山等語陝省山內零匪節據惠齡與奎等查奏祇剩二三十人朕疊經降旨恐深山密箐中尙有潛藏未出

之賊必應窮搜務盡今南山內雖已據報肅清而  
太白山老林又竄出另起零賊數十人果不出朕  
之所料太白山係楊芳專管地方今又有賊竄出  
咎實難辭設使楊芳有意迴護隱匿不報必將伊  
從重治罪特念其據實咨報尙無諱飾情弊姑示  
薄懲以觀後效著祖之望傳諭楊芳伊從前經惠  
齡等保奏朕交軍機大臣存記俟南山肅清後加

賞提督銜今太白山復有竄出零匪楊芳咎無可  
辭特因其不自諱匿是以僅將伊加賞陞銜之處  
註銷該鎮當倍加感奮戴罪立功迅圖歲事本日  
已降旨諭知額勒登保飭令提督楊遇春帶兵回  
陝督同楊芳吳廷剛等將太白山零匪協力排搜  
現在此起殘匪業已殲斃二十餘人楊芳如能於  
楊遇春未到之前將該匪全數辦竣尙可將功抵

過倘稍有遲誤則獲咎更重不能再邀寬貸矣所  
有此次殺賊陣亡之守備秦繼昌把總袁華俊著  
咨部賜卹

初九日

辛丑

吳熊光奏言據道員王正常稟報竹

山縣團練委員張從鼎在三里坡擒獲賊目陳

升一名解送到

臣

訊係積年賊目當將該犯正

法並據竹谿縣徐如灝探報前竄竹谿賊匪數



十人經提臣楊遇春派兵搜捕擒獲賊匪二十  
餘名逃出被裹難民十餘名餘匪已由向家壩  
轍山入川境又據叅將毛秉剛稟報該將在歸  
州一帶搜捕十九日探有賊匪五十餘人假充  
兵勇由歸州之龔家橋游家河竄至南漳縣屬  
之段江店子壩毛秉剛帶兵抄截該匪復由保  
康折入興山龍口河老林毛秉剛仍帶兵緊躡

追往等情

臣

查此起零匪人數稍多是否由川

省老林竄入歸州龔家橋抑或卽係慶溥等所  
辦陰峪河竄往大草塘之賊未據各鎮將報到

臣

現在飛札飭查並添調遊擊李東宣金洪翮

挑帶趨健兵勇馳赴該處幫同毛秉剛剿捕又  
飛信知會楊遇春並飭邊界各鎮將一體探蹤  
攔截務須就近撲滅不使逸入川境其餘搜捕

零匪之各路官兵寨勇連日亦各有擒斬俱已  
倍加獎賞用昭激勸至房縣解到拏獲賊匪藍  
貴一名供係鄉勇並非賊匪其餘鄖宜所屬稟  
報案情內亦多有川陝夫勇散出滋事此等桀  
驁不馴之輩必須遇事嚴懲除將藍貴各犯分  
別嚴辦外並遵

旨剴切曉諭撤遣之勇以守法者必安爲安頓犯法

者亦不稍寬貸使各勇等知感知畏不致別滋事端至楚省自遵

旨團練以來各寨民人頗知敵愾亦屢有殺賊効命之人惟是各寨大小貧富不等其中食力民人僅能結寨歛於合業捕賊者十居七八不得不設法鼓舞原定章程殲擒散匪一名賞銀一兩

此次德楞泰到楚與臣商定又每名加賞銀一

兩目下賊數無幾卽酌爲增加亦不致多費

臣

現已遵

旨懸立賞格生擒活賊一名賞銀五兩殲斃賊匪一

名減半賞給如有拏獲大小賊目仍照原定賞

格給賞並出示曉諭各寨同心併力趕緊搜捕

以冀及早肅清奏入

上命軍機大臣傳諭吳熊光曰此時楚省餘匪惟歸

州地方之五十餘人一起爲數稍多業經毛秉剛帶兵緊躡該處與川境接壤路徑叢雜該匪等或情急復思竄川現在祇有毛秉剛一員帶兵追截恐稽時日雖經該督添調李東宣等馳赴幫捕尙恐不足深恃至楊遇春昨因祖之望奏到陝省太白山內另有逼出零匪數十人業經諭令帶兵回陝趕緊辦理該提督接到吳熊光知會自己不及

兼顧著吳熊光於慶博李天林吉林泰數人內酌  
派一員迅往督辦務將此五十餘殘匪就地殲盡  
勿使再有他竄爲要又據奏審訊逃勇藍貴一節  
該犯雖曾充鄉勇旣經脫逃假充賊匪肆行搶掠  
自當嚴辦示懲該督仍當出示曉諭以鄉勇等從  
前幫同官兵殺賊打仗皆爲國家出力良民現當  
大功告蕆一二餘孽搜捕垂盡從此地方寧謐爾

等樂業安居正可共享太平之福如有不守本分  
在外滋事一經查出必當從重治罪斷不因會充  
鄉勇稍從寬減如現在拏獲藍貴等犯均經按律  
辦理卽屬前車之鑒爾等當各知儆畏勉爲良善  
何苦自棄前勞甘蹈法網如此剴切示諭該勇等  
自可漸就斂戢至此等鄉勇散遣以後不能保其  
必無滋事嗣後如再有查獲鄉勇犯事之案除情



罪較重不容曲貸者自應從嚴懲辦外其餘或搶竊鬥毆所犯祇尋常案件而該鄉勇從前或經殺賊奮勇賞給翎頂著有勞績及打仗受傷者該督於審明後一面仍按律定擬一面將該犯從前出力之處據實叙明具奏請旨候朕酌量辦理但此語該督祇可密存於心遵循妥辦不可稍有宣露轉致鄉勇藐法也再各處團勇堡寨從前原因禦

賊而築今匪黨全就廓清自當以次拆毀以免日  
後藏垢納污之患今據奏各寨民人頗知敵愾殲  
擒首夥賊匪不少該寨勇等既能急公出力亦當  
加以體卹所有空閒堡寨吳熊光應善爲勸諭令  
其自行陸續徐爲拆毀不必派官役過於迫促致  
有抑勒別滋事端設吏胥等有因勒索不遂押令  
拆毀等事尤當嚴行查禁以杜擾累

同日兵部奏議准湖廣總督吳熊光請將湖北  
提標後營守備移駐湖河鎮提標右營守備移  
駐樊城俾資彈壓奏入

上從之

十一日癸卯勒保奏言臣前與額勒登保會合擬

定章程分別條款於十六日恭摺具奏後額勒  
登保卽東向大寧所屬之六堂溪尖山壩一路

進發督剿老林遺孽

臣

由開縣新寧東鄉等處

督催各路官兵四路窮搜茲據副都統銜達斯

呼爾岱副將羅習臬等報稱官兵連日在奉節

雲陽毗連一帶山內搜捕十七日探有零匪二

三十人在洲海寺核桃灣一帶卽分路迎躡殺

賊四名生擒十五名內有探馬頭岳葫蘆餘皆

戰手訊係齊國典股內剿散之賊均就地正法

又據叅將羅思舉稟報連日在雞鳴寺一帶老  
林探有零匪適副將閻俊烈由陝邊搜捕前來  
當卽彼此知會分路追擊殺賊五名生擒十二  
名奪獲長矛四十餘件並檢獲兩湖總督賞號  
銀牌一百二十面查訊活賊何正貴等供稱係  
青藍黃各號的人今年正月間在湖北衝李大  
人營盤這銀牌是那時候搶的各犯內何正貴

何爾棟任士林等三名傷重難解立時正法其  
活賊九名解赴額勒登保營盤聽候審辦又據  
副將馬元稟報該副將與都司瞿心能高星文  
守備張萬林周志林等分帶兵勇在馬壩場觀  
音山大巖等處分路排搜搜獲賊匪十七名均  
就近解交大竹縣審辦又據副將桂涵稟報該  
副將在梁山一帶搜捕拏獲賊匪一名又據臬

司劉清稟報有老龍洞店民袁朝文前來報信  
有白號偽總兵邱高科戰手徐成貴一名在南  
江所屬鑽天坡藏匿劉清卽派軍功李樹勛等  
緝獲稟解來營臣親提訊明當卽正法其報信

之民人已飭劉清就近給賞又據署雲陽令梁  
敦懷稟稱近日該境馬草壩林內藏有零賊七  
人經該縣差王國賢前往招撫將該匪向洪遠

等七名全行招出開列姓名錄供具報前來

臣

查覈供單均係貴號剿散餘黨分別遞籍管束

又據大寧縣知縣郭南英稟稱縣役廖泰等協

同寨民拏獲賊匪二名錄供稟報前來

臣

查覈

供情內何登義一名在苟朝九一路充當探馬

頭當令正法其邱元秀一名被擄未久飭令遞

籍安插又據大寧縣汛把總邵祥稟稱在熊家



河地方殺斃零匪二名生擒二名解縣審辦又  
據東鄉縣團練委員胡雲稟稱搜獲青號偽先  
鋒王文舉蒲英祿二名又據達縣委員潘贊梧  
稟稱搜獲白號旗手李鳴鳳一名又據達縣委  
員倪朝縉搜獲零賊四名又據開縣硃民盤獲  
賊匪一名均經臣提訊屬實概行正法以上各  
兵勇團練人等均照格給賞又據探報總兵田

朝貴於二十日在新開場地地方搜捕殺賊十餘

名生擒二十餘名已解額勒登保軍營查辦

臣

查零匪愈剿愈散似此零星逃遁經官兵及團

勇等協力搜捕自能日就肅清大寧縣汛把總

邵祥向在該境防堵汛卡偵探賊匪極爲認真

得力此次搜捕零匪該把總會同知縣郭南英

帶領兵勇同往各有斬獲可否一體

身三才卷之二  
三  
賞戴藍翎以示鼓勵長壽縣知縣余鈺招集流亡撫  
綏安輯在任四載始終不怠茲建造城垣又能  
首先倡捐俾士民共相激勸踴躍急公可否仰  
懇

聖慈賞加知州銜遇缺卽用知州銜署雲陽縣梁敦  
懷一員自嘉慶二年署理雲陽縣以來團練義  
勇修葺城垣轉輸糧餉於一切軍務認真出力

茲復能疊次招撫零匪著有成效卽懇

聖慈先賞加知府職銜以示鼓勵又新築長壽縣城  
工共用銀三萬一千一十一兩三錢內該縣仝  
鉅捐銀一千兩紳士李坦等五百五十七戶共  
捐銀一萬八千九百八十二兩又閩邑糧戶等  
共捐銀一萬一千二十九兩三錢謹據實另摺  
奏懇

恩施以示獎勵奏入

上命軍機大臣傳諭勒保曰此次各路鎮將搜捕及  
委員黎民等盤獲匪犯殲擒不下百餘人川境餘  
匪愈剿愈少此時不過一二零星奔竄之賊自當  
日就肅清該督惟應飭令帶兵人員趁此大兵未  
撤之時上緊窮搜務期掃除淨盡力臻完善不可  
稍有草率至摺內稱劉清稟報有老龍硎店民袁

朝文前來報信將邱高科等一犯拏獲審明正法  
已飭劉清將袁朝文就近給賞等語所辦是此等  
居民聞知賊匪藏匿報官緝拏到案經詳晰審訊  
後如果實係匪犯自應將報信之人給予賞賚或  
獲犯係屬賊目卽將報信之人酌賞翎頂亦無不  
可若審係虛誣捏報究明實有挾仇邀功情事卽  
應將報信之人按律治罪則以人等知所感奮可

資協捕亦不致啟誣良報復之漸惟在該督詳慎  
辦理

同日

上諭內閣曰勒保奏知州銜署雲陽縣知縣梁敦懷  
久在軍營始終不懈辦理招撫事宜著有成效大  
寧縣知縣郭南英策勵兵勇搜捕認真懇請分別  
加恩梁敦懷著加恩賞給知府銜郭南英著加恩

賞戴藍翎又據奏大寧縣汛把總邵祥防堵卡汛  
搜剿得力亦著加恩賞戴藍翎以示鼓勵

上又諭內閣曰勒保奏遵旨查明捐建長壽縣新城  
之該縣紳士人等分別懇恩鼓勵一摺現任浙江  
杭州府知府李坦著交部議叙附貢生戴大棟著  
以府經歷縣丞卽用拔貢生吳瓊著以本班直隸  
州州判復設教諭卽用增貢生傅大綏著以主簿



吏目卽用廩生李能異著以訓導卽用監生左維  
鏞文童生胡國泰俱著給予八品頂戴餘著由本  
省照例分別獎賞以示鼓勵至長壽縣知縣余鈺  
首先倡捐俾要工迅速觀成該員前經吏部議叙  
著賞加知州銜遇缺卽用

十五日丁未額勒登保奏言臣由高坪中古溪雪

泡山進發據派出搜山之都司祁恩榮守備顧

應全等在馬鹿巖殺賊二名生擒二名又據叅  
將羅思舉稟報自風坪地方將零匪剿潰仍卽  
緊躡至七桿山殺賊二名生擒十六名訊出襄  
陽老教僞總兵馮正明一名據供附近仙女池  
老林尙有同夥賊匪在彼藏匿該叅將卽帶兵  
前往立將賊匪四人生縛又在向家寨老林搜  
獲黃號餘匪雷文貴一名并將活賊耳記解送

呈驗

臣

逐加審訊分別凌遲正法據達斯呼爾

岱羅聲臯報稱連日兵行雲陽地方探得北海

壩山林有賊六七人川芎灣有賊十餘人晝伏

夜出兩處相距不遠當卽分兵探剿斃賊三名

生擒僞先鋒張朝龍及戰手十七名並無一名

兔脫并訊據張朝龍供稱係青號餘匪曾充僞

先鋒其餘均係積年戰手錄供後卽分別凌遲

正法其殺賊三名內又訊出掌櫃李明學首級  
等情均卽給予賞銀獎勵并飭令達斯呼爾岱  
等乘此勝勢卽由雲陽山向大寧山內再加搜  
剿又據副將唐文淑稟報千總周士貴外委李  
倫在南井關等處搜捕殲斃賊匪一名又長壩  
尖峯寨民獲賊二名把總喬鳳友盤獲賊匪一  
名遊擊劉元明獲賊一名內有青號偽總兵李

添佑一名并據大寧縣知縣郭南英稟報平南  
漕寨民殺賊一名生擒一名東鄉縣知縣楊世  
鰲稟報鳳凰寨民搜獲賊匪一名至川北通陝  
省邊界一帶據達自祥劉清稟報招出零匪八  
名搜獲活賊二名通江縣委員徐若蘭督率寨  
勇在鸚鵡山搜緝斃賊二名生擒一名委員朱  
啟在三花灘搜獲二名又將軍興奎派令都司

永明守備馬玉麟搜山盤獲零匪二名賽冲阿  
派令巡哨之額外外委張世清獲賊一名守備  
王英在西溪口一帶獲賊一名都司柯連仲在  
老鴉口彈子溪斃賊五名生擒一名訊明均係  
川邊打散零匪臣批飭將獲犯正法耳記驗明  
照格給賞其餘各處營卡具報會哨並無遺孽  
地方均各寧謐伏查山內零匪經各官兵四路

排搜其勢更益零星現在達斯呼爾岱田朝貴  
羅思舉等各將所帶兵勇分爲數路由東南向  
西聯絡臣亦派察將特依順保劉健標帶兵由  
新開場大塘口白森坪等處山林探搜又令守  
備馬忠良何榮帶領兵勇由十里坪大小零溪  
萬春河一路而進守備顧應全馬仕相帶領兵  
勇由安子坪仙文溪一路而進楊遇春亦派都

司張起鰲劉騰祥帶兵由高觀寺梭羅寨東北  
向西南排搜德楞泰亦分兵兩路由寶塔紅池  
壩萬春河天字城自東向西探剿而來此時山  
內共計有兵勇二十餘路逐處常川窮搜餘匪  
斷難潛匿正由七里溝出山初四日至太平八  
台山王家營因陝省防剿鄉勇中多係川省民  
人不願在陝入伍必須趁此大兵未撤之先隨



時散遣因思刻下南山零匪有楊芳帶領本鎮  
各官兵足敷搜洗副將吳廷剛原帶在山協剿  
之鄉勇五百餘名已帶赴漢中交陝安道朱勲  
照例資送回籍

臣

並派員前赴副將劉管城營

卡將遊擊薛國相原帶留防鄉勇四百餘名一  
併給資散遣並將應留應撤各兵丁酌定名數  
派員前赴各營卡查點分別歸集俟楊遇春到

來令前赴陝界將應留之兵定地分段防範應  
撤之兵卽分起分路陸續起程沿途查照奏定  
章程辦理臣現駐王家營探聞德楞泰已由雞  
鳴寺橋壩嘴一路而來勒保亦由東鄉移師太  
平境內均相距不遠臣俟兩三日內與德楞泰  
勒保會晤後卽當馳奏六百里捷摺上慰

宸厪

額勒登保又奏言伏查安康縣之大坪平利縣  
之鎮坪地方接連川楚界嶺最爲扼要是以奏  
明令賽沖阿駐紮統率鎮將防堵刻下零匪已  
卽肅清大兵卽可凱撤邊界山林間有一二殘  
孽交鎮將備弁帶兵搜緝足資辦理賽沖阿自  
應卽回本任臣現札令在附近邊界茅壩關防  
剿之貴州安義鎮總兵劉瑞前赴大坪將管卡

事直接管以便賽沖阿卽日交代起程其八仙  
河鎮坪雞心嶺一帶營卡毗連川楚仍交總兵  
喜明管領督飭各將備嚴爲防堵搜緝並令劉  
鼎將貴州山東廣東各省兵丁查點歸集聽候  
凱撤臣並撥出寧夏兵丁五百名西寧兵丁四  
百餘名令中衛協副將蕭福祿同備弁帶領前  
赴漢中候賽沖阿到時先行帶回原省此外尙

有甘肅兵丁現在歸集俟挑留分段防範後其餘亦卽陸續凱撤回甘以實營伍

同日德楞泰奏言臣前將楚境邊防並所剩零

星遣擊交吳熊光慶成督辦搜拏臣移師回川

所有遊擊馬濟勝都司余步雲等前由房境硝  
硃子截剿南奔興山龍門河之賊四十餘名又  
向歸州之龔家橋東遁都司麻光裕業已尾追

前往臣查叅將毛秉剛帶兵七百餘名原在興

山一帶搜山卽飛飭其由東面水月寺迎截

又飭歸州沿江搜捕之遊擊金洪翮李東宣等

亦帶兵就近協同毛秉剛趕緊剿洗計三路官

兵有二千餘名又有慶成在彼督辦諒日內當

已掃除又據叅將馬文斌等稟報在房縣一帶

搜山鄉勇龔錫命斃賊一名兵丁周應龍獲賊

一名又外委何貴在筲箕凹殺賊二名外委劉朝相等在興山縣屬之山牙坪殲斃一名馬文斌等現由房縣之長房河鮑家山興山之桂達坪一帶搜捕回川等情又據遊擊金洪嗣李東宣稟報千總謝英楊林在巴東之鐵廠壩搜獲賊匪一名又總兵吉林泰稟報兵丁楊成秀賀發倫在空桐樹壩搜殺賊匪二名兵丁吳佳順

拏獲活賊一名兵丁唐正明在巴東之曾家嶺  
拏獲賊匪一名一併解送慶成處查辦核計楚  
境所剩零匪不滿百名辦理斷不致有稽遲又  
准豐紳來信並總兵蒲尙佐面稟川楚邊界內  
外連日巡查俱已無賊

臣

復查驗川境沿邊所

設卡隘均爲嚴密惟大寧之通城一處尙未安

兵

臣

卽令本營叅將馬文斌遊擊涂陞等帶領



兵勇七百餘名駐彼扼截庶川界東面與楚境  
西界均爲周密又遊擊王國輔等前自房縣硝  
碕子大凹截剿入川之賊三十餘人節有擒斬  
趕至大寧之大溪地方又殲斃賊匪三名生擒  
二名因黑夜追賊陣亡兵丁一名難廕千總高  
守謙墜馬落巖身斃查此起賊匪現只剩十餘  
人王國輔等緊躡追剿卽可洗除又據總兵蒲

尙佐稟稱外委唐福率同寨勇在巫山之黃金  
山擒獲賊匪二名均解營分別辦理又探得田  
朝貴追賊在太平之柏森坪殲擒二十餘人

臣

查川楚邊界內外現在兵勇實爲梭織巡查零  
匪不能藏匿惟太平大寧老山箐林額勒登保  
親督將領進山趕剿各逆畏避分逃難保無三  
五零匪免脫東奔

臣

現在振旅西行分兵三路

令副都統銜色爾滾副將張應貴帶馬步兵勇

由水口西進令副將馬應國等帶兵勇由川楚

邊界之馬塘磨刀溪入山搜剿

臣

督率副都統

富僧德總兵馬瑜等由天池子哨樓奉節之草

堂河黑樓門西進沿途共搜獲賊匪十一名於

二十七日齊抵大學之寶塔適豐紳帶兵巡搜

而來

臣

復將邊界卡隘並搜捕事宜面爲商論

探得額勒登保現在開縣山內高坪雞鳴寺一  
帶督搜此時川境零匪統計不滿二百名均皆  
星散分逃而到處均有官兵不難分投拏獲自  
易肅清勒保現在大竹梁山一帶自亦必移師  
而來臣現距雞鳴寺不遠疑卽赴額勒登保處  
三面會合籌商一切遵

旨聯銜拜發六百里喜摺後臣卽先行北上冀得至

行在扈蹕瞻仰

天顏均奏入

是日未刻額勒登保德楞泰勒保由六百里馳

摺奏言

臣

等仰蒙

恩命總統師千剿辦教匪於上年冬底先將大局戡  
定當卽馳報凱音上紓

宵旰維時老教成股之賊雖已掃盡無遺而三省毗

連地界山深林密道路綿長尙有餘黨被官兵  
剿散四處藏匿苟延殘喘且該匪等梟獍性成  
怙惡不悛有久經殘敗之徒而畏罪偷生復事  
糾結者亦有本屬脅從之衆而久假成真乘機  
搶掠者困獸猶鬪餘燼未除臣等憑仗  
天威載揚

聖武將三省官兵分作數十路策勵將士協同團寨

無分雨夜到處窮搜或臨陣誅夷或沿途盤獲  
或零星俘斬或聚而殲旃所有著名遺孽如姚  
馨佐陳文海宋應伏劉道勳子曾芝秀宋國品  
齊國典靳思慶李顯碧冉潘張士虎趙聰觀崔  
宗和胡明遠熊老八等先後伏誅者統計又有  
十餘名此外僞總兵僞先鋒等素不著名之賊  
節次擒斬者亦不下數十名其餘賊夥經官兵

掃除及州縣招撫者復以千計此皆仰賴

聖謨指示

睿算周詳故臣等得所遵循克臻完善近日陝省已

報肅清川省地方經臣額勒登保與臣勒保在

太平大寧及雲開新達等山內外遍處排搜實

已無成起之賊臣德楞泰亦將楚境餘匪殲除

殆盡頃移師四川並將巫山奉節一帶邊境順



路搜查亦已寧靜卽使深山窮谷或有一二餘孽三五爲羣零星潛匿者不過如鼠竊狗偷之輩酌留兵勇緝捕斷不能稍有漏網不值因此稽我師徒是以臣等前此籌商凱撤事宜酌擬章程分別條款卽行恭請

聖訓仰荷

諭旨詳晰指示纖悉不遺臣

等跽誦之餘實深欽佩

悅服<sup>臣</sup>等查前議留防兵數已極充足各就本

省現在征兵分撥其數有盈無絀毋須再留客

兵至鄉勇一項歷年招募防勇均已全撤無存

征勇亦節經裁減此時所存勇數無多皆久在

行間出力打仗之人卽與征兵無異故<sup>臣</sup>等前

有改新兵之請茲旣仰蒙

恩允是該勇等皆有歸宿毋庸更籌防範至三省邊

境留防事宜昨臣德楞泰已將楚境官兵分段

安設奏蒙

聖鑒在案至陝境防兵久經分段安設惟爲數尙多

應行分別撤留臣額勒登保已將應撤應留官

兵酌定名數派員前往歸集頃提督楊遇春已

來營會合臣額勒登保將陝境留防事宜詳細

告知令其卽只回陝會同將軍興奎妥協辦理

所有川省兵勇刻下尙在分路搜山必須先爲  
酌定應留應撤各數仍將應留兵勇派定投落  
安設分委鎮將管帶各專責成逐路會哨排搜  
以期一匪不留地方永臻寧謐臣等卽日趕緊  
辦理務期川陝二省邊界與楚境現設官兵形  
勢聯絡聲氣相通一俟辦定再行恭摺奏

聞茲拜摺後臣額勒登保暫駐川境與臣勒保會同

辦理

臣德楞泰卽遵

旨於七月初九日自川省太平起身由陝省定遠一路兼程行走期於中秋節前趕抵熱河瞻覲

聖顏叩謝

天恩跪請

慈訓所有川陝楚三省餘匪肅清及官兵分別凱撤留防各緣由謹合詞由驛六百里馳奏伏祈

睿鑒奏入

上諭內閣曰本日由六百里遞到額勒登保德楞泰  
勒保會奏官兵剿捕餘匪全竣三省地方肅清喜  
摺覽奏實深欣慰邪教匪徒雖不過內地莠民聚  
衆倡亂然剿辦已閱八年之久溯自嘉慶元年命  
將出師正值朕受璽之始親承

訓政荷蒙

皇考睿謨廣運

指示機宜纖悉備至惟因賊黨蔓延日久一時未能迅  
就掃除我

皇考聖壽益高猶復

籌諮不倦每於軍書旁午之時朕躬侍

左右仰見

宵旰焦勞無時或釋殷殷

望捷直逮

彌留朕追維

光烈益凜仔肩親政以來辦理軍務一一恪遵

遺訓申明紀律連年將稔惡首逆殲擒淨盡匪黨數萬

一律殄除上年冬間業已三省耆定馳告歲功祇

因大山老林不無餘孽竄匿偷生復諭令經畧叅  
贊等遴派官兵四出窮搜及今又閱八月始能全



聖訓  
卷三  
四  
境肅清本日中元節朕恭詣

安佑宮行禮瞻拜

聖訓

世宗

皇考聖容正在虔籲

恩慈而未刻已據馳報捷書如審斯應此皆

具翁默佑

祖

考垂麻得以底績告成仰酬

皇考在天未竟之志稍釋朕躬繼序之責從此海宇攸寧天下臣民共享昇平之福皆由

皇考訓誨貽謀實不敢存運籌決勝之意惟帶兵大員等懋著勤勞允宜再加甄叙經畧額勒登保衆贊德楞泰於上年冬間奏報大局戡定時錫爵酬庸

曾邀上賞現雖係剿捕零匪辦理又經八月有餘  
奮勉窮搜不遺餘力前後誅斬著名遺孽十有餘  
名此外僞先鋒僞總兵等又殲擒數十名其餘賊  
夥殲擒招撫者共以千計現在更無遺孽三省地  
方寧謐辦理實爲宗善願勒登保者加恩賞給白  
玉喜字搬指一件白玉大吉牌一件白玉翎管一  
件鑲玉帶牌一件鎗匙袋一個黃緋大荷包一對

小荷包四個德楞泰著賞給白玉喜字搬指一件  
白玉大吉牌一件白玉翎管一件鑲玉帶牌一件  
順袋一個黃辦大荷包一對小荷包四個俱仍交  
部從優議叙額勒登保現因經理善後事宜暫留  
川省其賞件卽由驛發往德楞泰業已起程來京  
著派伊子乾清門侍衛副都統銜蘇沖阿親賚賞  
件迎交祇領四川總督勒保湖廣總督吳熊光陝

甘總督惠齡督率地方文武及堡寨人民幫同搜捕勤勉出力著加恩均交部議叙再發去白玉搬指三個翡翠搬指一個瑪瑙搬指五個磁搬指十個磁帶頭十個磁鼻烟壺十個大荷包五對小荷包十個著加恩賞給出力將領官員又發去一兩重銀牌一百面五錢重銀牌二百面著加恩賞給出力兵勇均交經畧額勒登保分給並著查明實

在超衆出力人員據實保奏候朕施恩以示鼓勵  
軍機大臣等承旨書諭獲與觀成大學士慶桂宣  
力有年且在軍機處行走班次居首著加恩賞戴  
雙眼花翎大學士董誥之子董淇本由廕生任戶  
部員外郎著加恩以郎中用尙書劉權之尙書德  
瑛在軍機處行走一年劉權之著加恩交部議叙  
德瑛昨因會同禮部具摺字句粗忽部議上時已

經加恩留任此時毋庸交部議叙尙書戴衢亨之  
子年尙幼稚伊姪候選縣丞戴嘉穀著加恩賞加  
知縣陞銜仍令在

寶錄館効力行走軍機章京等着軍機大臣查明出力  
之員據實保奏候朕加恩本日接遞喜摺之奏事  
員外郎瑞寧著加恩賞戴花翎仍交部議叙其在  
奏事處領班之御前侍衛副都統扎克塔爾及郎

中滿保清安員外郎常申德興克蒙額均加恩交  
部議叙兵部捷報處之員外郎景德著加恩賞戴  
花翎員外郎德昌前已賞戴花翎主事札蘭泰前  
已賞戴藍翎著與等帖式輔良劉永澤均加恩交  
部議叙其自軍營至京沿途及驛站接遞喜報之  
官員夫役著加恩交該督撫查明分別陞賞用示  
蕙功行慶至意



同日

上命軍機大臣傳諭額勒登保勒保曰本日早間額勒登保德楞泰奏到各路搜捕並卽日會合商辦情形未刻卽馳到剿捕餘匪完竣三省肅清喜摺已明發諭旨宣示中外矣此時軍務全局業已告蒧德楞泰已遵旨來京瞻覲所有餘剩零匪楚省不及百名川境不及一百名額勒登保仍當督率

鎮將上緊搜緝淨盡不可稍有鬆勁上年馳遞大  
功告竣黃摺後究因帶兵人員不免稍存懈緩以  
致搜捕遲延又將及八月今此次已奏報全局肅  
清務須鼓勵弁兵乘此精銳之氣將各處深山老  
林偷竄殘匪一律搜捕無遺况前摺內搜獲之賊  
尙有偽總兵偽先鋒等可見剿剩餘匪尙有兇狡  
之徒在內尤須趕緊洗淨不留一孽俾地方永臻

寧靖方爲妥善惟是此後搜捕餘匪除臨時抗拒  
被擒者仍照舊辦理外其零星搜獲者總當訊明  
確供分別懲辦若仍前一概誅戮不特弁兵等有  
意邀功或至戕及無辜並恐兵丁寨民等有仇殺  
等事累及善良殊有關係且聞從前德楞泰一路  
擒獲餘匪從賊一年者始行正法所辦較寬額勒  
登保一路所辦較嚴從賊三月者卽行正法辦理

殊未盡一此後應酌定章程從賊日淺者量予末  
減或改爲發遣其從賊日久應行正法者或解經  
畧或解總督處覆訊亦當恭請王命辦理額勒登  
保等可通飭各鎮將一體遵照至前摺內稱陝省  
防剿鄉勇多係川省民人趁此大兵未撤之先隨  
時散遣所辦甚是又另摺稱賽冲阿原駐鎮坪地  
方現交鎮將帶兵搜緝足資辦理已令賽冲阿交

代起程並先撥出寧夏兵五百名西寧兵四百餘  
名令中衛協副將蕭福祿帶赴漢中候賽沖阿帶  
回原省所辦俱好惟太白山續添零匪數十人尙  
未據陝省奏報剿捕淨盡額勒登保卽嚴催楊遇  
春楊芳等迅速肅淨不可稍有稽遲德楞泰現已  
交印起程伊瞻<sub>即</sub>凱同時額勒登保等自己將川楚  
餘孽一二百人<sub>以</sub>搜捕無遺俟德楞泰到川額勒登

保更替來京卽額勒登保先期辦竣亦必俟德楞  
泰回川鎮撫方可振旅還朝也

十六日戊申軍機大臣慶桂等奏遵

旨查明川陝楚豫四省應行

遣官告祭各名山大川並四省山川內靈蹟顯應處

所開單呈

覽

陝西省

西嶽華山

西鎮吳山又

昭靈普潤太白山神

河南省

中嶽嵩山

淮瀆之神

濟瀆之神又

黃河神

四川省

江瀆之神又

灌縣敷澤興濟通佑王並其子李二郎承續廣惠

顯英王

湖廣省



南嶽衡山

又查自剿捕邪匪以來川陝楚豫四省大兵所  
至地方山川祠宇靈蹟顯應處所

湖北省

真武帝君廟

武當山

關帝廟

荊州

四川省

文昌帝君廟

梓潼縣

陝西省

漢江之神

終南山之神

定軍山漢臣諸葛亮祠奏入

上諭內閣曰川陝楚軍功告歲捷書馳奏入表同懽  
因思前此兵燹擾及三省地方並曾竄及豫境大

兵所至仰賴山川効靈

神祇助順用得師行貞吉全奏底平允宜修舉明禋

敬答

鴻佑所有四省

嶽

瀆諸神湖廣河南著派賡音邵自昌於審案事竣後

分往告祭陝西著派額勒布初彭齡於查辦事竣

後分往告祭四川卽派勒保親往告祭凡載在祀  
典者著該衙門照例撰文將應用儀物虔備發往  
其向來告祭所不及而自用兵以來經過名山大  
川靈蹟顯應各祠宇經軍機大臣查明開單進呈  
均著頒發藏香分交承祭各大員一體申謝

上又諭內閣曰自剿辦邪匪以來軍機章京等繕錄  
諭旨承辦軍報勤慎無悞上年大功告歲已將該

章京等交部議叙分別給予軍功加級紀錄昨三省奏報肅清復命軍機大臣將章京中出力之員查明保奏茲據開單進呈所有滿洲章京玉寧文孚瑞麟興科昌宜泰武爾通阿漢章京錢栢任恒何金姚祖同張志緒糜奇瑜黃躍之盧蔭溥吳光悅袁煦著再加恩賞紀錄二次

臣等謹按剿辦邪匪一事裁定大局係在嘉

慶七年冬間亦旣掃機槍而除蝨賊矣然而  
遠猷不尙於速成邛治必歸於盡善燎原之  
火旣滅餘燼寧任其復然滋蔓之孽未除本  
根卽慮其能殖古人有言曰去疾莫如盡此  
違誅之寇不當存玩視之心而戰勝之師未  
易奏凱旋之唱也我

皇上成算周詳

睿謨廣遠

甲明將帥董率師徒勿憚險艱勿辭勞瘁勿以成功  
而自詡勿以窮寇而稍疎分兵則四面排搜  
合力則循環會哨卡隘倍嚴其究詰堡寨亦  
助其殲擒兵不足則立

命添兵餉旣敷而更聞增餉

詔書諮訪務達下情羣策圖維統歸

裁決蓋自戡定以來至是凡八閱月然後捷書踵至  
全境肅清又繼此而搜拏零匪者一年有餘  
而餘氛始克淨盡人第知領兵大員下及從  
征之士薄風雪入林箐棄鍋帳撤乘騎師行  
久頓愈剿愈難勞苦倍增於昔而抑知  
宵旰之籌幾慎終如始

聖神之圖治勿懈益虔其備見於茲編者固非淺識



所能仰窺萬一也哉